

geben solte/ Den Menschen die Kranck vñ  
schwach/ vñ durch Kranckheit von Leibes  
Fressen bekommen wehren/ Nicht aber/  
Das man gasterey / oder zechen damit hal-  
ten/ oder sich darein volsauffen solte/wie  
hernach geschehen/da zugleich / beide der  
Menschen vbermut/vñ menge des Weins  
wachs/zugenommen/vnd mit der vielheit  
des Weins/ Der mißbrauch derselben er-  
wachsen vnd eingerissen/ Das also ein ge-  
seuff vnd vollerey/ zu letzt daraus worden/  
Dazu doch die Naturen der Menschen/in  
vnsern Landen/ allwege fast wol genei-  
get gewesen sein/vnd der wegen leicht auff  
solche vnart gerathen können/mehr denn  
anderer Nationen Völcker / Derhalben  
es auch numehr/Gott besser es / mit dem  
schendlichen vnd heßlichen gebrauch des  
sauffens/dahin gerathen ist / vnd so weit  
vberhand genommen hat / Das man vns  
Teudschen / dieses einigen lasters halben/  
in allen frembden Nation vnd Landen/  
vbel spricht vnd nachredet/ Also/das man  
von vnserm verstande/Weißheit/Tugend  
vnd Manheit/schier nichts mehr / wegen  
vnser trunckenen lebens vñ wesens/ hal-  
ten wil/ Vnd ist dieses fals fast alles vnser  
Lob/ Ehr/ Preis/ vnd rhum/ gar dahin  
vnd weg/ vñ haben mit dem leidigen sauff-  
fen/vnsern guten Namen verlohren/wel-  
chen wir zuorn / bey allen Völckern vnd  
frembden